

■ OR DA LA VITA DA LUDMILLA CAHENZLI

Eugen? Lain far in pop?

In pac pampers custa 8.90 francs e cuntegna 38 sdratschs. I sa tracta da la sdratscha la pli bunmartgada ch'è da preschent sin il martgà. Ad in pop svizzer fan ins probabel sitg quatter giadas il di. Il pac sdratscha tanscha pia var 10 dis. En in mais dovri per in normal pop svizzer trais da quests pacs sdratscha. Quai custa circa 27 francs. Nun ch'il pop haja la fuira ed ins stoppia far sitg pli savens.

Ma sche geniturs d'in pop svizzer èn in pau temelits e pensan che la sdratscha bunmartgada pudess scurtgar il tgilut dal pitschen descendent, cumpran els sdratscha da meglra qualitad. Per exempel in pac per 26 francs che cuntegna 70 sdratschs. Ils custs per la sdratscha muntan lura circa a 50 francs il mais.

Quest'emna ha il cussegl dals chantuns decidì d'unifitgar ils supplements d'uffants en Svizra. Fin uss era la chombra pitschna sa nuspida ed aveva refusà l'unificaziun. Ma ussa han ils cusseglers dals chantuns tuttina lubì ils supplements minimalis da 200 francs.

Tge munta quai per nus, ils Cahenzlis? Duess jau, Ludmilla Cahenzli, forsà prender mes um Eugen per il maun e dir: «Ve Eugen, faschais in pop!» Ils politichers vulan gea promover las famiglias cun questa decisiun. I duai dar dapli pops. «Kinder braucht das Land!», scriva ina gasetta en quel connex.

Ma avant che carmalar mes um en chombra ed avant d'interpreter pass irreversibels, fissi inditgà da far ina u l'otra calculaziun.

Dapi il 2005 obtegnain nus, sco mintga autra famiglia grischuna, 185 francs il mais per noss uffants. Mess il cas ch'il parlament federal na mida betg anc opiniun, e mess il cas ch'il supplement minimal va en vigur, e mess il cas ch'jau ed Eugen faschessan propi in pop, obtegnain nus per noss nov pop 15 francs dapli il mais. En lettras: quindesch francs dapli il mais!

E mess il cas che nus faschessan sitg noss pitschen novnaschì cun la sdratscha

la pli bunmartgada ch'è sin il martgà svizzer: ils 15 francs na tanschessan gnanca per finanziar il chajar e pischar dal nov pop Cahenzli.

Sut talas circumstanzas èsi plitost difficil da dumagnar mes Eugen en chombra da durmir per far in pop. Pli stimulant en quel regard fissan supplements da famiglia da, lain dir, 500 francs il mais per uffant. Cun quests daners pudess ins schizunt cumprar sdratscha che na scortga betg il tgilut dal pop charin. Ma sin

ina tala generusadad vegnan las famiglias svizras anc a stuair spetgar onnorums.

Ludmilla Cahenzli

PS: Per fortuna n'è il far pops betg la sulletta motivaziun per Eugen da svanir en chombra da durmir sut il tarpet cun sia dunna. Uschiglio buna notg Ludmilla!

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria

